

大法炬陀羅尼經卷第五

使五

隋北天竺三藏法師闍那崛多等譯

四聖諦品第九

佛告阿難爾時放光如來復告眉間白毫梵天言梵天汝今將非自以具足辯才問斯義

使五

耶汝豈不知此菩提門順諸聖諦乎梵天言世尊云何名為順於聖諦佛告梵天可不用此諸助道法與彼聖諦和相應耶梵天復言世尊如來所說四聖諦者即是諸佛隨順次第而說無異一切菩提覺法佛如是說已

佛復告梵天言汝知佛說四聖諦不梵天言世尊我亦少知四聖諦義佛言梵天汝云何知四聖諦義梵天言世尊我所知者謂苦聖諦苦集聖諦苦滅聖諦苦滅道聖諦世尊我如是知四聖諦義佛言梵天汝言苦諦其義

云何梵天言世尊我親從佛聞如是說非此五陰名苦諦乎聖人觀察除斷我見證彼無我以證知故見此五陰如賊如怨即便捨離五有生處世尊我如是知苦聖諦義世尊若我不聞佛所說者我終不能作如斯說何以故如是義者唯佛證知非我境界所有疑惑唯佛能斷所以者何唯佛能知一切諸法無障礙故如佛所說我如是知世尊我今欲聞四聖諦義唯願世尊為我解釋何故名聖云何名諦佛告梵天所言諦者名之為實實名一體聖名方便證知故名聖諦梵天復言世尊云何名實佛言梵天所言實者名順隨義汝當諦聽善思念之吾今為汝分別解說梵天汝知諸阿羅漢得漏盡時所捨事不梵天言世尊我不能知諸阿羅漢得漏盡時

所捨之事梵天諦聽吾爲汝說於有漏法一心厭離不受生死是名爲捨是名漏盡亦名畢竟畢竟捨故住彼實中一切捨故名之爲實梵天所言聖諦即是五陰當知五陰是苦因緣是故五陰名爲怨賊一切聖人如實覺知故能捨棄以是義故名苦聖諦是故世尊說此五陰爲衆苦本名爲怨家亦名欺誑聖人觀察如實知故名爲聖諦復次梵天言集諦者是無知滅此集滅者是佛世尊爲諸賢聖方便而說此若實者無有是處何以故梵天所言集者即是虛妄者是虛妄則不名滅所言滅者則非虛妄非虛妄者是爲聖諦言聖諦者謂阿梨耶阿梨耶者名知五陰聖人諦知諸陰非實是故能捨名爲聖諦以捨著故名殺大怨所有集者當知非實若見集生

是爲常見若見集滅是爲斷見諸佛如來作如是說非集非滅是爲聖諦此即名道道者所謂真實之道即諸聖人深達五陰應如是知復次梵天趣求義故名之爲道梵天當知譬如有人作是思念我於過去作何等身我

於過去作如是身彼二種念則是虛妄更復思惟我於過去從何所來我於過去曾如是來亦爲虛妄梵天當知一切諸法皆是分別無有真實亦復如是是則名爲清淨道也

忍校量品第十

使五

二

阿難爾時彼放光佛復告眉間白毫梵天言梵天此陀羅尼法門寬大無邊今當爲汝開顯初門菩薩行法少分之事當知如來方便密教梵天譬如寶主爲求寶故欲入大海於先積集種種資裝所謂船權帆柁生熟餽糧

凡是海中供用諸物咸悉備之置於海岸唱如是言誰於今日欲入大海求諸所須以除貧乏若有能者宜同此行時衆多人爲求利故若二十乃至百千俱願入海時大寶主見衆已多即自思念是大衆中其有身羸力少怯弱小心不堪經險難與從事我應遣還如是思已遂宣告曰諸人當知今此大海深闊無邊不可期以時月歲數而剋迴還方復海中有八大難何等爲八一者惡波二者旋流三者摩竭四者鰐魚五者諸餘大魚六者夜叉羅刹七者惡風八者惡龍如是八難難可過度脫當逢遇船壞命終誰能堪忍無怖畏者宜於今日共處此船若疑不堪荷負險阻各隨意還衆人聞已多即還散如是梵天今此衆中有無量人聞此陀羅尼甚深法門

寬大無邊心生驚恐作如是念此陀羅尼但說一句無量歲數尚不能盡若具說者誰堪聽受如是無量無邊衆生或生退心或起種種愚癡惡邪煩惱障礙輪轉生死如是梵天如來世尊爲欲增長彼等衆生諸根欲力亦令成就不退轉心故如彼寶主見諸賈人怯弱不堪慮其敗壞明說海難乃至命終諸恐怖事遣還本所梵天當知彼大寶主能有如是密謀深智大方便力如來亦爾以大方便爲此億數諸菩薩衆欲開發彼無量無邊億那由他不可思議大智慧忍而諸世尊所有不思議大智慧忍之所行處但爲阿毗跋致菩薩摩訶薩說令得成就不退轉忍如是甚深大功德忍一切衆生無能知者唯除深樂大乘法者彼當能住如是忍中爾時眉間白

毫梵天復白放光佛言世尊彼忍何故名爲無量無邊也佛告梵天是忍功德不可筭數故言無量不可窮盡故言無邊諦聽梵天譬如此閻浮提周遍充滿無價衆寶於彼須彌山頂復有一摩尼珠名曰威華以此滿閻浮提無價衆寶與彼山頂一威華珠本非稱量寧可爲比復次梵天置無價寶假使此威華寶滿四天下彼須彌頂復有一寶名釋迦毗楞伽以四天下滿威華寶亦不敵彼一毗楞伽也復次梵天置威華寶假復聚積彼毗楞伽上至有項猶亦不如補處菩薩更有妙寶名曰寶精此寶能爲補處菩薩諸莊嚴具隨彼菩薩凡所受用欲入胎時而於母腹先爲宮宅菩薩然後從天降入受最後身如是菩薩福德力故感得此寶生身常用菩薩身大

使五

五

寶亦隨大是寶能成無量福聚從初發心乃至十地諸功德聚是寶所生梵天當知如是勝寶過於一切世間出世間勝功德力所生之寶復次梵天彼出世無價功德大寶集大善根開發教化勝出衆寶云何名爲大功德聚及大善根如是梵天彼最勝上功德善根者我先爲汝說此法門一句之義無有價量無有筭數出世勝寶差別說已復次梵天又以無價最勝寶故今更引喻梵天譬如此閻浮提除去諸山及衆瓦石其地平正無有丘墟自閻浮提地上至三十三天滿中諸人皆獲初禪成就一心名上凡夫梵天於意云何彼得初禪勝上凡夫心所念智所知之處名爲何等梵天白言世尊名爲世間智慧境界佛告梵天於意云何一須陀洹人心所念智

所知之處復名何等梵言世尊名爲出世智
慧境界佛言梵天假使滿閻浮提勝上凡夫
盡其心力能知一須陀洹人心智境不梵言
不也世尊何以故凡夫不知出世事故如是
梵天一切凡夫尚不得知云何能得稱量言
說是故雖滿此閻浮提已得初禪勝上凡夫
終不可比一須陀洹梵天白佛寶爾世尊何
以故彼諸凡夫唯得初禪猶尚未得二禪已
上乃至四空世間勝法云何能知須陀洹等
所知出世法也梵天當知是爲第一無價衆
寶譬喻差別復次梵天置一天下勝上凡夫
假使滿四天下皆是須陀洹盡其智力亦不
能知一斯陀舍心之所行智之所證乃至不
能思惟稱量少分邊際梵天是爲第二勝寶
譬喻差別復次梵天置四天下滿須陀洹假

後五

六

使滿四天下皆斯陀舍終不能知一阿那舍
心之所緣智之所證乃至滿四天下諸阿羅
漢亦不能知一辟支佛心智境行梵天是爲
第三第四第五寶喻差別復次梵天置阿羅
漢假使滿四天下皆辟支佛共盡智力若欲
思量一生菩薩入母胎時心智境界證入次
第大願深忍問答演說及諸威儀終不能知
不能思量不能分別不能聽說乃至不得彼
法少分唯除如來應供正遍覺乃能知耳梵
天是爲菩薩第六勝寶譬喻差別復次梵天
此閻浮提滿中天寶如上喻說乃至須彌頂
寶名曰威華我今爲說此寶威光及以德用
更引諸喻顯其少分此言難信唯除證者梵
天若取威華勝寶置於須彌山頂是大海水
深八萬四千由旬其下乃有諸龍宮殿住所

及阿脩羅迦樓羅等宮殿住處所有衆寶及
大海中種種寶珠彼大德龍神通力故珍寶
瓔珞皆有光明諸阿脩羅雖多諂詐神通瓔
珞亦有勝光如是一切光明若遇威華衆寶
光明皆滅不現梵天猶如日輪現時悉能映
蔽諸螢火光喪不現其事若此梵天當知
此日輪光繞須彌山餘方現時彼山頂寶於
閻浮提作大照明爾時梵天白佛言世尊是
威華寶從何而來誰德所感佛告梵天大海
最下有金剛際於彼際下有一火聚名爲多
日光明熾盛此即大鐵圍山根本出處彼有
金地名曰解脫是威華寶從此而生梵天復
言世尊彼威華寶云何無價佛告梵天此四
天下一切所有小大諸山樹木叢林及諸藥
草皆悉熾然遍燒欲界猶如劫盡彼火盛時

若於梵宮取一威華投置火內如一念頃大
火即滅猶如大雨能滅小火此寶威神亦復
如是梵天此寶現時誰福所致梵天復言世
尊我以不知先問此義是威華寶威力住處
唯願善說令我得解佛告梵天如劫盡時三
千世界百億天下各隨本所一切炯然當於
是時取威華寶置於梵宮是寶威光能令欲
界諸天宮殿下及地獄凡所至處猛火即滅
皆得清涼如秋九月夜後分時劫火皆滅能
作清涼亦復如是梵天是時衆生以福盡故
諸摩尼寶隱沒不現衆生無計能得是寶彼
威華寶不可得見如辟支佛出世甚稀復次
梵天從海下至第四風界彼有風輪名曰極
駛彼風輪上有火輪界名曰不壞恒常熾然
猛焰不絕彼火輪上有一威華安住在一摩

尼寶上以彼二寶威光德力能持火輪熾然不絕亦復能制令彼火輪不得燒壞大地諸方大鐵圍山須彌山王及大海水如是一切皆以依彼威華寶珠及勝摩尼光明德力乃得安住復次梵天所言毗楞伽寶者純真金色善根所生自然彫瑩乃能出過須彌山頂初利天處夜摩天處兜率天處住於梵宮菩薩從閻浮提生兜率已善根力故此寶自然生於篋中作降魔事何以故梵天若有諸魔及魔眷屬發大惡心趣兜率天作諸障礙壞亂菩薩雖共盡力而不能動所以者何由此摩尼寶莊嚴具在菩薩頸珠威力故所有魔事自然壞滅魔王波旬深生憂惱又是菩薩初從天降入母胎時彼莊嚴具亦常隨逐乃至初生出家坐於道場菩提樹下彼寶恒在

是時魔王與其軍衆無量億數現百千種大恐怖事奮其威猛諸鬪戰具菩薩端坐寂然不動破魔軍已成等正覺梵天當知彼釋迦毗楞伽勝摩尼寶有如是力何況菩薩處兜率時魔王獨能爲障礙也假使餘天及兜率天亦不能損以寶常隨菩薩身故時彼梵天復白佛言世尊彼釋迦毗楞伽摩尼寶唯有是德更有餘力耶佛告梵天彼寶威力乃有無量非唯此也梵天此閻浮提縱闊七千由旬其地形相北闊南狹如婆羅門車時彼天下有四王治處何等爲四一者人王二者蛇王三者惡馬王四者惡龍王梵天此閻浮提毒蛇遍滿咸有瞋心盡吐毒火更相噓齧已及他身皆爲灰燼當於彼時鳥獸及人觸此毒火即便喪滅如是瞋毒諸惡龍等自相燒

滅沉復餘類梵天此閻浮提蛇毒充滿於意
云何如是蛇衆可謂多不梵天言世尊甚多
甚多佛告梵天於此三千大千世界所有惡
龍及諸龍王有大神通於虛空中起大重雲
奮大電光震大惡雷放大霹靂雨大雹兩出
種種聲現種種威梵天於意云何如是龍衆
可謂大不梵天言世尊甚大甚大佛告梵天
於此三千大千世界所有惡人惡馬諸惡毒
等住於邪道然後遣令觸彼惡蛇惡龍惡馬
乃至惡人皆起瞋心惡心惡力惡行惡事乃
至惡道具足如是諸恐怖時如是菩薩於兜
率天開發顯示彼摩尼寶令彼惡毒衆生等
見衆生觀已惡事消滅世界清淨惡心自息
柔軟和順慈愛歡欣皆以見彼摩尼寶故梵
天當知此釋迦毗楞伽寶乃有如是無量無

邊大威德力若具說者終不可盡時彼梵天
復白放光佛言世尊如佛先說菩薩身寶名
寶精者有何功德唯願開示令我等聞佛告
梵天汝今不應問斯大事何以故一生菩薩
善根深重凡諸果報非彼世間所堪知見所
以者何如是菩薩欲入胎時是寶先導隨菩
薩身而作佛事出時亦爾是故此寶寶中最
勝乃有如是無量勢力汝等梵天若知寶處
則往供養恭敬禮拜不應問我有何功德梵
天白言世尊我於此義無復疑心爲諸衆生
故發斯問欲令聞者生歡喜心以是義故我
諮世尊如此問者欲於將來具行佛事增長
菩提世尊是菩薩寶下閻浮提時威德力故
日月光明尚皆喪滅而况星宿諸火光等能
不滅乎是故此寶最爲殊特常依菩薩摩訶

薩所一切梵天應將是寶安置梵宮尊重恭敬禮拜供養作希有事世尊此寶光明能蔽日月星宿火光令不復現而彼日月星火等光無滅沒者皆是如來神力所為不使世間常處闇冥所以者何如來世尊有大慈悲加被一切諸衆生故若無如來威神加者乃至一切梵天光明亦皆失滅佛告梵天言加護者義何謂也梵天言世尊加護義者以上被下劣依勝故諸佛世尊一切諸事勝出世間諸人天等譬如日光出時諸螢火光悉皆失滅如來威力若不加者一切人天光明喪滅亦復如是世尊我於如來威神德力無復疑心何以故我觀如來心無厭足是故我今爲未來世諸衆生等敢問斯事佛告梵天汝今頗知有諸外道五通神仙所得四禪四空三

使五

十一

摩跋提入出心行不梵天言世尊我今少知外道諸仙所得禪定三摩跋提然此衆中有未解者來世衆生復不能知是故我今問如是義欲令衆生不知者知亦令將來未解者解梵天世間無有語言及義文句名字而能離此陀羅尼門修多羅者梵天所有諸修多羅或祇夜或授記一切他所問者或有此三十七助善提法所攝乃至顯說行者皆悉入此妙陀羅尼深法門中是以今此陀羅尼門即爲三世諸佛已說當說我今現在亦復演說若有人能如我所說憶念受持是陀羅尼者此人未來還得如我說如斯法我於往昔亦曾供養恭敬尊重無量諸佛彼諸佛等亦以此陀羅尼修多羅法門教化成就無量億數諸大菩薩摩訶薩衆佛告梵天我念過去

無量億劫有佛世尊名勝三昧如來應供正
遍覺出現於世彼最後身所生之處其父輪
王名大精進七寶具足統四天下菩薩即是
寶后所生第一太子常處深宮與八萬四千
衆美女俱如是諸女皆以種種名寶瓔珞摩
尼天珠而爲莊飾前後圍繞遊觀園林無量
妙音以娛菩薩猶如帝釋歡喜之園然是菩
薩有大人相一切世間無能及者梵天菩薩
後時問衆女言汝等誰有赤檀箜篌如其有
者今宜前進時有一女以赤檀箜篌奉授菩
薩菩薩彈已作是思惟如此聲者從何所來
爲從弦生爲從柱出爲棍有耶爲槽作乎如
是思已知聲無定復作是念我若不觸即不
出聲如是聲者應從手出作是念已即便以
手觸於虛空聲亦不出因此方知手無定聲

使五

十二

知無定已即復思念今此聲者虛妄不實假
衆因緣和合而有彼諸衆生甚大愚癡常爲
無明迷惑所覆不知見覺耽著此聲因爲放
逸具造衆惡墮三惡道菩薩如是深猷離時
即入三昧入三昧已悉捨世間五欲衆具凡
是所重如棄湊唾身昇虛空住虛空已復作
是念我今此身必定成佛如是念時即便獲
得大勝三昧三昧力故足步虛空詣菩提樹
至樹下已結加端坐身不動搖梵天菩薩如
是結加坐時有一魔王名拘知舍住菩薩前
以偈讚曰
丈夫速成佛 爲世安樂故 無憂甘露句
滅盡諸煩惱
佛告梵天我於爾時作婆羅門名速疾身觀
彼菩薩坐道樹下將成正覺內自思念我今

要當在菩薩前一心合掌恭敬而立彼成佛時乃可休息於是七日七夜住立諦觀更無餘念不念飢渴不覺疲勞亦無睡眠過七日已菩薩方證無上菩提轉大法輪梵天我於爾時彼佛法中起增上信捨家出家願我當

十三

來亦成正覺如今莫異梵天彼佛世尊知我發心精進勇猛堪能荷負無上菩提便授我記告言仁者汝於未來過無量劫當得作佛號曰放光如來應供正遍覺汝最後身其所生父轉輪聖王名祭火光即於生世捨家出家修行未幾成正遍覺梵天我於爾時與菩薩眾十四人俱我等並於十四年中專精讀誦此陀羅尼彼勝三昧如來於十四年中有所宣說唯一法句我等聞是法句義已即時獲得不退轉忍以此忍故無復一切煩惱怖

畏梵天時彼如來為十四菩薩於十四年中教化成熟令住不退轉地不壞不動猶如金剛其心牢固眾善熏心於諸法中得不退轉時彼梵天復白佛言世尊我今已知彼諸菩薩不退轉行猶未審知此陀羅尼修多羅說一句門其義云何佛告梵天此修多羅一句門者即如來藏此一句門若具說者假使三千大千世界所有諸聲及眾音樂所謂四天王聲忉利天聲夜摩天聲兜率天聲化樂天聲他化自在天聲乃至魔王宮殿一切諸聲皆為法音演茲一句猶不能盡何以故由一句門顯示佛藏深寬大故梵天此如來藏寬大無量無際無邊不可窮盡若宣說者令諸眾生身心清淨安隱快樂昔所未得今悉得之斯皆由彼如來藏故

三乘教品第十一

佛告阿難時放光如來於大眾中命一婆羅門子毗舍佉言汝毗舍佉若聲聞人凡欲教化云何能令他人歡喜先當自淨身口意業發誓精進善學法義常多思惟成就智慧然

使五

十四

後教他令生歡喜增長善法若不如是不能令他於彼義中分別解說應如是住如是念如是學何以故若無智慧即非善學尚不自知況能教他毗舍佉譬如世間剪角特牛無有鬪事既不自護亦不護他何以故無鬪具故如是毗舍佉若沙門婆羅門諸眾生等不勤學者不能思義不如說行不能為他談說議論何以故無智慧故但有憍慢憎我所心自他善法皆悉損減是故有智慧者不起憍慢無我所心我想不生亦無執著不貪己身

何以故見聖諦故不生煩惱惡毒滅故無有諍論離怨敵故無我所心不自讚故除欲煩惱不念餘事唯觀因緣亦教他觀十二因緣一切生滅毗舍佉是則名為聲聞行人善自防護身口意業亦能教他遠離三過復次毗舍佉辟支佛人則不如是無有說想但自覺悟不能教他所以者何是人斷絕大願深行唯樂寂靜不願化生一向不能宣說諸法亦不能說善惡業報乃至生死過患涅槃安樂一切不說唯觀他心知有樂欲即便普現神通變化自在無礙令他信解為物福田生大功德隨其所願即能成滿勝聲聞人以得自在神通力故毗舍佉彼亦丈夫以於過去久遠修習少欲知足今如是行如是業如是願以本願故於佛法中但取少分唯現神通隨

使五

十五

古本
線棍子也
槽切昨勞